

عور-سار-اسوسغ 62

- 1 رڳي واحدوت اد-دار-سيگڙيلغ اسونفو،
دارس ا-غ-طافغ لمان.
- 2 رڳي واحدوت ا-يگان اجاريف-ينو
ئيگ لبرج ئيگ انتال-ينو،
عور-سار-موسغ.
- 3 ار ماناڅو ا-را-تيريم ا-تاگلم ف-بنادم،
تيريم ا-ي-تسزرم زوند اغراب ئيگنان،
زوند تابيا ئيهرمن؟
- 4 ار-كن-يتعجاب ا-تادرم تيكركاس،
تسكرم ف-ا-ي-دي-تگرم زغ-تاريگت-ينو.
دا-تاگام تاميمت س-يلس
ئيمّا ءول ئيعمر س-واسموم.
- 5 رڳي واحدوت اد-دار-سيگڙيلغ اسونفو،
د-نتان ا-غ-ن-څيغ رجا.
- 6 رڳي واحدوت ا-يگان اجاريف-ينو
ئيگ لبرج ئيگ انتال-ينو،
عور-سار-اسوسغ.
- 7 رڳي واحدوت ا-را-ي-يسبيد غ-لامان،
د-نتان ا-را-يساتوي ءيسم-ينو،
ئيگ اجاريف ئيزگان ئيگ ازواڅ-ينو.
- 8 واي-ايتما تيقات غ-رڳي كرايگات تاساعت،
تينيم-اس ف-كولو ما-يسغوفون ءول-نون،
نتان ا-غ-ا-نتزاواڅ.
- 9 هاتي امزلوض زوند تونفوست ا-يزراي،
ئيمّا بو-وايدا تاوارگيت كا-يگا.
نتني س-سين هاتين فسوسن ف-يات-تونفوست،
ار-سرسن-ياقلاي لميزان.
- 10 ا-ور-تبّوم س-ما-دي-تگيسم س-يفادن،
ءولا-دا-تاويم رجا س-ما-دي-توگرم.
ئيغ-د-يوشكا لخير ئيگوتن ا-ور-فلاس-تسكرم.
- 11 هاتي يات-توال ئيساول سيدي رڳي،
تيس سنات-توال سفلدغ-اس ئينا،
نتان ا-بدا-يحكامن غ-كولو ما-يلان.
- 12 د-نتان اد-اغ-يران س-لحنانت-نس ئيزگان،
د-نتان ا-يتخلاصن ئي-كرايگات يان ف-ما-يسكرم.